

Perlu bijak pilih kursus, IPTA

FAKTA
Tambah
1,100
tempat

Persaingan kursus perubatan, farmasi, perakaunan begitu kritikal

>>Oleh Kamarulzaman Pid

amar@hmetro.com.my

PUTRAJAYA: Pelajar le-pasan Sijil Pelajaran Malaysia (SPM) dan Sijil Tinggi Persekolahan Malaysia (STPM) serta yang setaraf dengannya, diingatkan supaya bijak memilih kursus dan institusi pengajian tinggi awam (IPTA) yang sesuai bagi mengelakkan mereka 'berputih mata' apabila gagal ke universiti awam tempatan.

Peringatan itu diberikan Ketua Pengarah Pengajian Tinggi, Prof Datuk Dr Radin Umar Radin Sohadi, berikutan persaingan memasuki IPTA begitu kritikal ketika ini terutama kursus perubatan, farmasi dan perakaunan.

"Bagi pelajar mencapai keputusan cemerlang, risikonya tidak begitu tinggi.

"Tetapi, bagi mereka mendapat keputusan yang baik, amat penting mereka memilih universiti yang tepat, kursus yang tepat dengan berdasarkan keputusan masing-masing.



DR RADIN...pilih kursus yang tepat

"Mereka perlu ada strategi tepat bagi mengelakkan mereka berada di luar senarai yang dipilih untuk memasuki universiti dan kursus berkenaan," katanya pada sidang media di pejabatnya di sini, semalam.

Berikutan permintaan tinggi terhadap kursus perubatan, Dr Radin Umar berkata, kementerian itu menambah 1,100 tempat lagi pada sesi akademik kali ini.

"Penambahan tempat bagi

kursus perubatan ini ditawarkan kebanyakannya di Universiti Sains Malaysia (USM) dan Universiti Teknologi Mara (UiTM)," katanya.

Beliau berkata, berikutan USM diisytiharkan Universiti Apex tahun ini, 3,500 tempat disediakan bagi program ijazah sarjana muda.

"Ini dibuat berikutan USM memberi lebih tumpuan kepada program pascasiswazah sesuai dengan tarafnya sebagai Universiti Apex.

"Calon berminat menyambung pengajian ijazah pertama di USM perlu mengisi borang berasingan menerusi laman web www.usm.com.my, tetapi mereka dinasihatkan supaya memohon tempat ke IPTA lain," katanya.

Katanya, secara keseluruhan 68,500 tempat ditawarkan di IPTA bagi lulusan SPM, STPM, diploma, matrikulasi, kursus asasi atau setaraf bagi mengikuti pengajian yang bermula 1 Julai depan.

"Hingga kini, kami menerima hampir 140,000 permohonan bagi mengikuti program pengajian peringkat

ijazah pertama dan diploma di IPTA menerusi aplikasi dalam talian.

"Jumlah permohonan itu diterima sejak dibuka bagi fasa pertama bermula 3 November lalu dan berakhir pada 31 Disember lalu," katanya.

Beliau berkata, setiap calon digalakkan mengunjungi Karnival Pengajian Tinggi yang diadakan Kementerian itu di seluruh negara.

"Karnival paling hampir akan diadakan di Zon Timur, pada Sabtu ini yang bakal dilancarkan Timbalan Perdana Menteri, Datuk Seri Najib Razak di Universiti Malaysia Pahang.

"Dengan mengunjungi karnival ini, mereka boleh memahami dengan lebih jelas mengenai pilihan universiti dan kursus yang sesuai dipohon berdasarkan keputusan masing-masing.

"Selain itu, kita juga meminta supaya pelatih Program Latihan Khidmat Negara (PLKN) di kawasan berhampiran supaya mengunjungi karnival ini bagi tujuan sama," katanya.